

TIPS MENABUNG MENGGUNAKAN WANG SYILING



Oleh **AMER AZLAN
ABDUL JAMAL**

amer@ums.edu.my

Pensyarah,
Program Pengurusan
Kewangan dan Perbankan,
Fakulti Perniagaan,
Ekonomi dan Perakaunan,
Universiti Malaysia Sabah

Mempunyai simpanan yang mencukupi dapat membantu kita menghadapi waktu kecemasan yang tidak dijangka, serta membuat perancangan untuk kehidupan yang lebih selesa di masa hadapan. Walaubagaimanapun, untuk melakukannya tidaklah semudah seperti yang diperkatakan, kerana budaya menabung masih belum menjadi amalan di kalangan masyarakat kita. Ada yang bersemangat untuk menabung, tetapi terhalang oleh pelbagai kekangan dan alasan seperti kos sara hidup yang tinggi, gaji yang kecil, serta bebanan hutang yang banyak.

Tidak mengapa jika kita susah sangat nak menabung. Yang penting, niat dan keinginan itu mesti ada, dan kemudian boleh mula dengan yang kecil dahulu. Ada banyak teknik yang kita boleh gunakan untuk menabung. Untuk entri kali ini, saya ingin

kongsikan beberapa tips mudah untuk menabung menggunakan wang syiling. Saya pasti ramai yang mempunyai tabung wang syiling di rumah. Namun, tak ramai yang bagi perhatian pada tabung ini berbanding tabung yang menggunakan wang kertas kerana nilainya yang lebih tinggi. Oleh sebab itu, tabung wang syiling ini (kebiasaanya) kurang mendapat perhatian dan hanya diisi apabila terjumpa wang syiling di lantai atau di poket. Sebenarnya, amat rugi jika kita tidak beri perhatian pada tabung wang syiling kerana kita menggunakan wang syiling dalam aktiviti perbelanjaan harian, sama fungsinya seperti wang kertas. Berikut adalah langkah yang boleh diambil untuk cepat penuhkan tabung wang syiling:

Elakkan memakai dompet yang mempunyai ruang menyimpan syiling

Menggunakan dompet yang mempunyai ruang menyimpan syiling akan melambatkan proses menabung. Ini kerana syiling tersebut akan sentiasa tersimpan di dalam dompet dan membuatkan kita lebih cenderung untuk menggunakannya. Bagi kaum lelaki, boleh menggunakan dompet jenis klip wang (atau *money clip wallet*) yang hanya mempunyai ruang untuk menyimpan kad

serta wang kertas. Selain rekaannya yang nampak *simple* tetapi *elegant*, penggunaan dompet ini memerlukan kita untuk hanya menggunakan wang kertas dalam setiap transaksi, sekaligus membantu mengurangkan kecenderungan menggunakan syiling. Setiap baki dari transaksi yang diterima (pastinya dalam syiling) akan bertambah dan memaksa kita untuk simpan sementara di dalam poket. Hasilnya apabila tiba di rumah, kita akan lebih cenderung untuk meletakkan baki wang tadi di dalam tabung.

Pada yang menggunakan dompet atau beg tangan yang mempunyai ruang menyimpan syiling (khususnya kaum wanita), anda boleh mula biasakan diri dengan mengosongkan ruang duit syiling tersebut setiap hari. Sebagai contoh, setiap hari selepas balik dari kerja, disiplinkan diri kita dengan mengemaskin beg tangan terlebih dahulu, semak atau buang segala resit dan “sampah” lain yang tidak perlu, dan letakkan semua duit syiling yang ada di dalam tabung. Lakukan ini dengan konsisten setiap hari. Mulakan dalam masa seminggu. Lama kelamaan, kita akan dapat momentum itu dan akan mudah terbiasa untuk menabung wang syiling. Kita tidak perlu ada banyak ruang duit syiling dengan alasan untuk kegunaan kecemasan, cukup sekadar mempunyai satu tempat simpan syiling di dalam kereta.

Contoh *money clip wallet*



Sumber foto: Mohd Hilmi Harun

Sumber foto: Mohd Hilmi Harun

Gunakan tabung digital

Jenis tabung yang digunakan juga memainkan peranan dalam amalan menabung. Penggunaan tabung digital dapat membantu menaikkan semangat untuk menabung kerana ianya mempunyai paparan jumlah simpanan, disamping rekaannya yang *transparent* yang membolehkan kita melihat sendiri wang syiling yang ada di dalam tabung tersebut. Dengan mengamalkan teknik pertama diatas secara konsisten, sudah pastinya jumlah simpanan kita akan meningkat setiap hari. Melalui cara ini, kita akan lebih bermotivasi untuk memenuhi tabung apabila dapat melihat nilai simpanan telah meningkat. Tabung ini juga perlulah diletakkan ditempat yang mudah dilihat dan dicapai. Ini bertujuan untuk memberi peringatan supaya kita tidak lupa, selain memudahkan tugas kita untuk menyimpan setiap syiling yang ada. Ini juga secara tidak langsung akan memberi kesan positif kepada minda, sikap dan persepsi kita terhadap aktiviti menabung.

Kedua-dua tips diatas bertujuan untuk memupuk minat serta sikap suka menabung wang syiling. Walaubagaimanapun, ianya tidak akan berkesan sekiranya kita tidak berdisiplin dan melakukannya dengan konsisten. Sebagai contoh, kelemahan utama menggunakan tabung digital adalah ianya mudah dibuka. Oleh itu, tips ini tidak praktikal sekiranya kita gagal mengawal diri dari sentiasa membuka dan menggunakannya. Mahu berjaya atau tidak, semuanya bergantung pada inisiatif dan usaha kita sendiri.

Selamat mencuba!



Contoh tabung digital yang banyak dijual di pasaraya atau secara atas talian